



REPUBLIKA E KOSOVËS / REPUBLIKA KOSOVA

GJYKATA THEMELORE GJAKOVË

Numri i lëndës: 2019:089729

Datë: 27.06.2019

Numri i dokumentit: 00380380

PKR. nr. 25/19

NË EMËR TË POPULLIT

GJYKATA THEMELORE NË GJAKOVË-Departamenti për Krime të Rënda, gjyqtari Gëzim Pozhegu, kryetari i trupit gjykues, me zyrtaren ligjore Arbënore Basha, në lëndën penale kundër të akuzuarit F.T., Komuna e Gjakovës, për shkak të veprës penale kultivimi i bimës së hashashit, shkurrese së kokainës ose bimëve të kanabisit nga neni 278 par.1 të KPRK-së, duke vendosur për pranimin e marrëveshjes për pranimin e fajësisë sipas propozimit të Prokurorisë Themelore – Departamenti për Krime të Rënda në Gjakovë PP/I.nr. 44/2017 të datës 26.04.2019, në seancën e shqyrtimit gjyqësor publik të mbajtur në praninë e Prokurorit të shtetit të Prokurorisë Themelore –Departamenti për Krime të Rënda në Gjakovë Ali Uka, të akuzuarit F.T., mbrojtësit avokat E.B. nga Gjakova, me datë 30.05.2019, mori dhe publikisht shpalli, ndërsa me datë 27.06.2019, përpiloi këtë :

A K T G J Y K I M

I akuzuari **F.T.**, Komuna e Gjakovës, ku dhe tani banon, i biri i H., nënës G., e gjinisë N., i divorcuar, ka të kryer shkollën fillore, i papunë, i gjendjes së dobët ekonomike, numer personal ..., ashkali, shtetas i Republikës së Kosovës, më parë i padënuar.

Ë S H T Ë F A J T O R

Sepse me datë 24.11.2016 rreth orës 12:00/h në fshatin O.H., Komuna e Gjakovës, pikërisht në oborrin dhe tavanin e shtëpisë së tij, pa autorizim ka kultivuar dhe mbajtur substancë narkotike të llojit marihuanë dhe atë me qëllim të prodhimit të narkotikëve ose substancave psikotrope ashtu që gjatë bastisjes së shtëpisë dhe objekteve tjera përcjellëse në tavanin e shtëpisë janë gjetur 20 bimë të llojit kanabis sativa me gjatësi prej 20 cm, ndërsa në oborrin e shtëpisë është gjetur e kultivuar një bimë e llojit kanabis sativa në gjatësi prej 20 cm, ashtu që nga ekzaminimi i kryer substanca narkotike ka rezultuar të jetë marihuanë në peshë prej 24.01.gram, të cilat janë konfiskuar nga ana e policisë.

- **me çka ka kryer veprën penale kultivimi i bimës së hashashit, shkurrese së kokainës ose bimëve të kanabisit nga neni 278 par.1 të KPRK-së.**

Andaj, Gjykata në bazë të nenit **6, 7, 17, 41, 45, 47, 73, 74, 75, 76** par. 1 nën par. **1.5, 278** par. **1 dhe 2** dhe nenit **233** dhe **365** të KPP-së, e:

GJYKON

Dënim me burgim në kohëzgjatje prej 6 (gjashtë) muajve, i cili dënim me pëlqimin e të akuzuarit dhe sipas marrëveshjes së arritur e bazuar në nenin 47 të KPRK-së, zëvendësohet me dënim me gjobë në shumën prej 2.500,00 €, të cilin dënim i akuzuari është i obliguar ta paguaj në afatin prej 15 (pesëmbëdhjetë) ditëve nga dita e plotfuqishmërisë së këtij aktgjykimi.

Nëse i akuzuari nuk dëshiron ose nuk mund të paguaj dënimin me gjobë, i njëjti do ta vuaj dënimin e shqiptuar me burgim në kohëzgjatje prej 6 (gjashtë) muajve, në të cilin dënim do ti llogaritet edhe koha e kaluar në paraburgim nga data 11.04.2019 deri më 23.04.2019.

Në kuptim të nenit 450 par.4 të KPPK-së, i akuzuari obligohet që të që të paguajë shpenzimet procedurale në shumë prej njëzetepesë (25) €, në emër të paushallit gjyqësor shumën prej njëzetepesë (25) € si dhe shumën prej pesëdhjetë (50) € në emër të kompensimit të viktimave të krimit, konform neni 39 par.3, nënpar.3.2 të Ligjit për kompensimin e viktimave të krimit, e cila shumë duhet paguar në afat prej 15 ditësh nga plotfuqishmëria e aktgjykimit.

Konfiskohet substanca narkotike e llojit marihuanë në peshë prej 24.01.gram, si objekt i kryerjes së veprës penale.

A r s y e t i m

Prokuroria Themelore në Gjakovë-Departamenti për Krime të Rënda me aktakuzën PP/I.nr. 44/2017 të datës 26.04.2019 ka akuzuar F.T., për shkak të veprës penale kultivimi i bimës së hashashit, shkurres së kokainës ose bimëve të kanabisit nga neni 278 par.1 të KPRK-së.

Gjykata ka caktuar seancën për shqyrtimin e marrëveshjes mbi pranimin e fajësisë ku prezentë kanë qenë prokurori Ali Uka, i akuzuari F.T. dhe mbrojtësi i tij E.B. avokat në Gjakovë.

Prokurori Ali Uka ka deklaruar se mbetet në tërësi pranë marrëveshjes së arritur dhe kushteve të propozuara me marrëveshje, ashtu që i ka propozuar gjykatës që të njëjtën marrëveshje ta aprovoi si të bazuar, pasi kjo marrëveshje është bërë me vullnetin e të akuzuarit F.T. dhe është në pajtueshmëri me provat e bashkëngjitura aktakuzës.

Mbrojtësi i të akuzuarit F.T., avokati E.B. ka deklaruar se mbetet në tërësi pranë marrëveshjes nga se në këtë marrëveshje janë shprehur elementet konform vullnetit të palës dhe prokurorit.

I akuzuarit F.T. ka theksuar se e mbështetë propozimin e mbrojtësit të tij, si dhe marrëveshjen e arritur me prokurorin.

Gjykata pas dëgjimit të pretendimeve të prokurorit, të akuzuarit dhe mbrojtësit të tij, lidhur me marrëveshjen për praninë të fajësisë, ka konstatuar se i akuzuarit F.T. e ka kuptuar natyrën dhe pasojat e pranimit të fajësisë sipas marrëveshjes, marrëveshja është bërë në baza vullnetare pas konsultimeve të mjaftueshëm me mbrojtësin e tij, i akuzuari nuk ka qenë i shtrënguar apo i detyruar në lidhjen e marrëveshjes, pranimin e fajësisë mbështet në faktet dhe provat që i janë bashkëngjitur aktakuzës, si dhe nuk ekziston asnjëra nga rrethanat për hudhjen e aktakuzës dhe pushimin e procedurës penale të parapara me nenin 253 par. 1 dhe 2 të KPP-së, andaj gjykata ka konstatuar se marrëveshja mbi pranimin e fajësisë ka mbështetje ligjore dhe

është e bazuar në nenin 233 par. 2 dhe 1 të KPP-së dhe gjykata ka pranuar marrëveshjen për pranimin e fajësisë.

Gjatë seancës për caktimin e dënimit prokurori Ali Uka ka deklaruar se mbetet pranë dënimit të propozuar me marrëveshjen për pranimin e fajësisë dhe atë dënim me burgim në kohëzgjatje prej 6 muaj, i cili dënim do të zëvendësohet me dënim me gjobë në shumën prej 2.000,00 € deri në 2.500,00 €, si dhe ka propozuar që substanca narkotike e llojit marihuanë me peshë prej 24 ,01 gram e cila është objekti veprës penale të konfiskohet në kuptim të nenit 278 par.2 të KPRK-së.

Mbrojtësi i të akuzuarit, avokati E.B. ka theksuar se pajtohet me marrëveshjen e arritur edhe sa i përket dënimit të propozuar.

I akuzuari F.T. ka deklaruar se mbetet pranë marrëveshjes dhe deklarimeve të mbrojtësit të tij të dhënë gjatë kësaj seance.

Gjatë marrjes së vendimit mbi dënimin dhe llojit të tij, gjykata ka vlerësuar të gjitha rrethanat lehtësuese dhe rënduese të parapara me nenin 73 dhe 74 të KPRK-së, të cilat ndikojnë në llojin dhe lartësinë e dënimit. Përpos konstatimit të kryerjes së veprës penale, në mënyrën, kohën dhe vendin të përshkruar si në dispozitiv të aktgjykimit nuk ka gjetur rrethana rënduese, ndërsa si rrethana lehtësuese për të akuzuarin ka marr parasysh pranimin e fajësisë, pendimin e tij, sjelljen korrekte gjatë seancës, është hera e parë që paraqitet pranë organeve të ndjekjes, e të cilat rrethana kanë ndikuar që të aplikohen dispozitat e zbutjes së dënimit bazuar në nenin 76 par. 1 nën par. 1.5 të KPRK-së, e të akuzuarit F.T. ti shqiptohet dënimi i paraparë me marrëveshje për pranimin e fajësisë dhe atë dënim me burgim në kohëzgjatje prej 6 (gjashtë) muaj, i cili dënim është zëvendësuar me dënim me gjobë në shumën prej 2.500,00 €, me bindjen e plotë se ky dënim është në harmoni me peshën e veprës penale, shkallën e përgjegjësisë së të akuzuarit dhe se gjykata është e bindur se me dënimin e shqiptuar ndaj të akuzuarit do të arrihet qëllimi i dënimit nga neni 41 të KPRK-së.

Vendimi për konfiskimin substanca narkotike e llojit marihuanë në peshë prej 24.01.gram është marrë bazuar në nenin 278 par. 2 të KPRK-së.

Vendimi për shpenzimet e procedurës penale është marr bazuar në nenin 450 par. 1 dhe 2 nën par. 2.6 të KPP-së.

Nga sa u tha më lartë u vendos si në dispozitiv të këtij aktgjykimi.

GJYKATA THEMELORE NË GJAKOVË
PKR. nr. 25/19 datë 27.06.2019

Zyrtarja ligjore,
Arbënore Basha

Kryetari i trupit gjykues-Gjyqtari,
Gëzim Pozhegu

KËSHILLË JURIDIKE: Kundër këtij aktgjykimi është e lejuar ankesa në afat prej 15 (pesëmbëdhjetë) ditëve nga koha e pranimin të të njëjtit, Gjykatës së Apelit në Prishtinë, nëpërmjet kësaj Gjykate Themelore.